

إصدارات جديدة

الولد الورد

شعر

عبد الزرّاع

دراسة:

أمجدريان



الهيئة المصرية العامة للكتاب

٢٠٠٤

إشراقات جديدة
تصدر عن الهيئة المصرية العامة للكتاب

رئيس مجلس الإدارة
د. سمير سرحان

رئيس التحرير
عبد العال الحما مصى

مدير التحرير
حزین عمر

سكرتير التحرير
أحمد توفيق

المخرج الفنى
صبرى عبد الواحد

تصميم الغلاف
الفنان محمود الهندى

• الإهداء •

• إلى عمى عبده الزرّاع

عرفاناً .. ومحبة

• إلى أبناء قريتي البسطاء برنبال

• وإلى فلذات كبدي؛

آية الله ، وعمر، وآلاء

• كتبت قصائد هذا الديوان في الفترة

من عام ١٩٨٨ حتى عام ٢٠٠١ م .

• الولد الوردة •

• إلى كل طفل فلسطيني قذف يهودياً بحجر •

الولد اللى بيتلخبط فى حروف اسمى الأولى
وبيتهجى ملامحه
وبتشعلق فى رقبتى
زى العقْد فى رقبة أمه
وبيفرِّك الطباشير دقيق أبيض
فيعفرُّ وش السبورة السوداء
تتبعتر ذرَّاته ويَّا الهوا
زعابيب وغبار
شايِل شَنْطَة مدرسته مليانه حجارة
ونشنجى من يومه فتوة
واقف على ناصية روحى

مستتيني أنام
وأخش الحلم وأدور ع الكوابيس
يفلت من نني عنيًا
ويهرب يمي الأحداث
بيعاندي جندي معلق
خوذة
ونجمة بست سنان
بيشد النبلة
ويضرب عينه بحصوة فتعمي عينه
فيموت م الضحك
ويجري يخش في حُضني ينام
ألاقيه الصبح فرحان
مرسوم على وشه نهار
أفهم على طول.. وأقول الله
وما بيني وبين نفسي
كنت أتمنى أكون وياه.

●

الولد أبو دم خفيف
وشيطان من يومه
وقرد بيتتطط تتطيط
شايل علمه الأخضرxأبيضxأحمر
وف ايده الثانية حجر
حالف ليقدم روحه هدية
لفلسطين
بيشاغب أى يهودى يقابله
ويضرب فيه
حالف ليعيد القدس
لحضن الوطن العربى
ويعيد للأقصى الروح والنور
علشان الوجع العربى يطيب

الولد الوردية
الروح والبنى
السابق سنه

طالع دوغرى ما يعرف ميل
ابنى حبيبى وضى العين
خايف لا تخونه رصاصة كلب يهودى
وتسكن قلبه الأخضر
زى ما سكنت قلب «الدرة»
وهو فى حضن أبوه
الولد اللى بيتلخبط
فى حروف اسمى الأولى
وبيتهجى ملامحه
يفلت من نن عنيا ويدخل
قلب الأحداث.



• ادينى امارة •

بتخُش الفرحة فى قلبى
ويتعلن عن حلم جديد
مولود مع شجر الصفصاف المائل
على شط الروح
فتبوح الأحلام بالسر
لوش الشمس الهريانة
من ضلّ تاريخ الأحزان
ترتعث الإيد...
وهى بتحضن جسم حبيبتى
المفروود عناقيد
من زهر الرمان والخوخ

●

إدّينى أمانة..
وأنا أخشّ لقلبك بالفرحة
عصفور
بيحب الزقزقة والطير
ويحب يغيّر لون الورد اللى هايدبل
ع الأغصان
ويحب يعيش فى العشّ اللى بناه
من كُتّر المشاوير

•

إدبنى أمارة...
وأنا أفرد جناحتي ع الكون
وأجيبك من ريش الطواويس
ومن النعام
وأجيبك أبريق
ورخام
وأجيبك من عين السما
نجماية
إدبنى أمارة..
وأنا أدلك قلبى
هدية.



• موسيقى العمر المخطوف •

الولد الوردة -

جنب النيل..
كانت قاعدة حورية
بتغزل آخر خيط من حلم قديم
والشمس هناك على مرمى الشوف
مكسوفة فى توبها النارى
ويتهرب ويّا الليل بشويش..
ونوارس روح البنت الشفافة
بتيجى تملّس على وش المية
تلقط سمكات..
وتهاجر فى دواير رحلة صيف
حران

وسفاين فرحانة
بترقص بالضى على المزيكا
زى النيل الفرحان
ما بيعت بنسيمه الطازة يهفـف
فى ضفاير محلولة
فتطير..
وتحاصر أحلى عيون
يا خضار البرسيم يا ربيعى
متّخذـه البنت وسرحانة - لحظة ما قعدت -
وكأن غزالة برّى بتجرى على الوديان
تعزف ألحان
وموسيقى العمر المخطوف خلّسة
بيفر من بين صبعينى
فى لمح البرق
وأتارى النيل متونّس بيها
سهران جنبـيها
غيران من طابع الحسن فى خديها

اللّٰه يا زمان .. اللّٰه
الوش ملاك ..
مخروط من قبضة نور
وعيونها السحر واخذها
لآخر ما يكون
والكحل يزيد فى جنونى جنون
وشفايف كيف الورد المقطوف من لحظة
وطاظة
وجمالها الأخاذ ببشد القلب
ويرحل لبعيد .
يا حبيبتى ..
على فين وخذانى
وساييه الشوق متدارى
والحزن الجوانى فى عيونك
بيطل ويتحاور ويّايا
وأنا صاحبي الوجدانى تركنى
وماعدش بيعت لى المراسيل

والعمر المحفور جوانا
بيفلت ويغيب
ويتبعت كل ملامحه
ليه طعم سكاتك..
بيفكرنى بزنازين الصمت العريانة
فى ليل طوبة البردان
م الخوف
بيكش الأسفلت والمسافات بتزيد
صارعى الأوقات الصعبة
برأى جرىء
ما يهمش كان..
ولا حتى الأحزان المربوطة بطرف
لسانك
نفضى أحزانك
وارمينى بضحكة بريئة
يمكن أقدر أرجع بزمانك
يمكن أقدر

أرسملك أحلى طريق

يمكن..

٢

م

ك

ن.



• كلنا أحبابك •

• إلى روح الشاعر إبراهيم غراب •

وفتحت الباب على وسعه
ولا يوم رديته في وش قصيدة
بتحبي ف قلب الشاعر
كان قلبك طيب
زي هلال رمضان
فردت السكة مواويل وأغانى
وقصايد من طين الأرض
غنيت «لبهية وياسين»
«ولأدهم»
ورسمت على زند دراعك
سيف عنتر

دخلت ف قلب الحاضرة وذكرت
وذكرنا معاك
وبقينا مردينيك
فينك..

ما انت اللي فتحت قدمنا الباب
ودخلنا وراك
كتبنا قصايد على نبض ايديك
فينك.. يا عم إبراهيم

●

كان وشك يتهلل بميلاد الشاعر
وتقول الله:
دايمًا يا بلدنا ولادة
حبلانة بقصايد وبدم جديد
فينك..

فينك.. يا عم إبراهيم
فين أيامك/ لياليك
وحديتك/ وغُناك

والبسمۃ فوق ضی جبینک
صوتک بیرن فی ودانا
وکأنک وینا
حافظین کل کلامک
هانحقق أحلامک
یا عم براهیم یا غراب
مافیناش أغراب
کلنا أولادک
کلنا أحبابک.



• أغنية نار •

مرشوش بالدم
يا وش الطير الطائر نن الغيط
يا حويط بملامح صقر
معاور صيده
طراطيف الشجر النائم
عبّ الريح
بيغازل رمش القمر النازف
خوف
وبيحضن قلب حبيبتى النابض
رعدة صيف
مجاديف الطيف الهائم ليل

بيشعوط كل مداخل روى..
ويبدل تخاريف الزمن المنسى
دليل إثبات
هايبات عصفور الجنة.. يغنى
أغنية نار
ويردد أشعار أنهار تجرى
وتفرط ماس
خريشنى بسن الألم الداكن
أتنطور منه
وأله بطرف الصبح الهائل نور
ويدور فى طبق بنور
شخللنى يا سيدى العابد
بين صوبعينك
خرجنى من قمقم خوفى
ديناميت الخندق بين كفينك
فينك..

فينك..

فينك..



خلينى رهينة تواشيح الفجر

الجاى

علشان الروح لو شفت

هاتلف الكون

وتمزّع كل خرايط الزيف

بالسيف

ويتوه اللون

يبهت لون الوسط الغامق

أبيض رايق

ويكون مجنون

لو عرّى القلب فى لحظة

وباح

تتفجر براكين منسية

فى حضن الأرض
دى غارات الحرب
بتكسر ضى الشمس النافذ
سيف
وبتولد أمطار..
ورعد..
وسحابة..
وبرق..
وعتمة..
وخوف.

●
لو شفت فى عيني الرؤية
إقرانى كتاب مفتوح
اوهبنى خريطة لنهر النيل
للخلق التايه ع الشطين
يستجد بيه وبيك

دنا واقف على حد حدود

الواحد بينى وبينك

فينك..

فينك..

فينك.



• مغنواقی •

مغنواتى أنا
أرغولى انتتى
لما سمعت الدندنة
كان الهنا واقف
على سدر المكان
مساحات أمان
متحزمة نجوم السما بالورد
رقصت جماعة وفرد
قال القمر: موال
من فرحتك يا مكان
اتفرط الرمان

●

مغنواتى أنا ..
ضهرى انحنى
لما الضنى ينده لى
صوتى القديم مبجوح
وأمى وراه بتتوح
وتقول: يا ولدى
يا طالع العلوة
هات لى معاك غنوة
تشفى تداوى الجروح
«دبوح يا دبوح
قلب العرب مجروح»



مغنواتى أنا
غنيت زمان للتمرحنة
ووُرد
غنيت للمجتمع والفرد
غنيت لزيف الهتافات
واللى انضرب ولا مات

غنيت لعشق البنات
غنيت لطفل الحداد
غنيت لتوب اتحرق
من جمر نار حدّاد
غنيت لضلّة الزنازين
غنيت ولا كليت
لون السواد فارد ضلوعه
ع الجبين
والأمل مكسور جناحه
لما كان المستحيل.

مغنواتي أنا
صوتي اتخرس
لما الحرس شدوا الزناد
شدّيت لجام الخوف
وركبت فرسة عنتره
أيوه يا ناس
دالخوف دا موت

والأخطبوط يعشق سواد الليل

وأبويا كان فارس

وبأسه شديد

وأنا مادنة فوق كل الجوامع

وأنا نسمة بتداعب وليد

خليك عنيد

عمري ما أميل زى الهوى ما يميل

عمري ما أخاف م اللي التوى

واللى نوى

يعشق رحيل

واللى نوى

يعشق رحيل.

●

• قصائد قصيرة •

● (١) أحلام:

ما تفتحيش..
لدى الأحلام
طاقات م النور
الدور خلاص
سكّت ببيانها
وقفلت كل الضلف

●

● (٢) لعنة:

ما كُتِّش الدرويش
في محرابك
فامتلعنيش بابك
لو
ما تفتحش..
بضحكتي.

• (٣) أرق :

حُبك بيتحدى الأرق
وأنا من زمان بتحرق
وأنزل فتافيت من
و
ر
ق

•

● (٤) صنم:

ما تَصْرَنِيْشِ ..

فِي مَنْدِيلِ الْمَحَبَّةِ

دَأْنَا قَلْبِيْ مِمَّكَ يَسْتَخْبِيْ

وَأَطْلَعْ بِدُونِهِ .. م

ن
ص

●

••

● (٥) فارس الأحلام:

ما قولتلك..
مشواری لسه ما ابتدأش
فبلاش تخوضى التجربة
حبة رياح
هايزقوا باب الأجوبة
وينطلق صوتك رصاص
فارس الأحلام.. ما جاش

●

• (٦) إخراج:

يا كعبك الدائر
وجسمك الرجراج
ونهدك الفاير
وعيونك الإخراج

● (٧) ابتدا المشوار:

بتخشيى حرير
فى دواير تكوينى المشروخة
وجع
فأحسك ريق مبلول
شربات م الدهشة
فأدوب فى الرعشة المشتاقة
لضمك
وأنام..
على سدر الأيام مبسوط

والصوت كبراج يلسعنى

يوجعنى المبنى

فأغنى

ابتدا..

«ابتدا المشوار»..

●

• (٨) هروب:

بأهرب
من جلد الناس النائمة
على الأسفلت
واتكحلّ بنعاسهم
وصفير القطر العطلان
في محطات الروح
بينازع ويشخر
ويأ أدان الصبح
المستظر

بتبان القضبان المفسولة

ممدودة على سدرى

فتهيج الرغبة المكبوتة

جوايا

فأهرب..

من جثث الناس

المدفونة

بعرض النفس الخارج

من فمى.

●

• وردك عتيق •

• إلى الصديق الشاعر، رأفت رشوان •

وليه يا صاحبي
تسحب الحلم القديم وتسافر
شايلاً همومك
وبتردد قصايدك
بتشد روحك من بين جدار
البيت
شجر لبلاب
وتكُـبُّ خوفك ع الصغار
حبر القلم
ورَدَلْكَ عنيد الملامح
والرؤى

عاكف في محراب السنين
بتدندن اللحظات
من وحي بوحك
وتسوّد الصفحات
من أمهات القول
قناديل بتجوى في الضلام
الحالك
كفك مش بيتهجى الطلوع
ولا كنش نجمك مختفى
دالغيب خفى
وبيصطفى م الناس
صديق
(إسلام) بيتشعبط في غُناك الحى
مرجيحة قلق
فابتستخبى بالورق منه
وبتحدفه بره الدواير
حلم ناير ضى أمه

فبيترسم برواز
وانت اللى خارج
من نزيڤ الصدق
منزوع الجناح
القلب باح
والحب راح
فبلاش تعد فى الجراح
لا النيل يفيظك
لما يترجى السمك ع الانتظار
ولا موجة طاغية ع الشطوط
بتعاكس الأفراح
دا العيد ده مش عيدك
لكن قصيدك
حلال.



• زى أنغام الكمان •

• إلى آية بنتى .. وردة الروح •

آية بنتى..
بتشخبط الأحلام فى كراسه لقايا
وبترمى وشى بوردة حمره
بتفتح الدراعات
وتضمنى
لحظة ما أخش
وهى نايمة ع السرير
ترفع إيديها للسما
وتقول: باااااا
أضحك قوى
من جوه قلبى

وهى تضحك من غير سنان
زى أنغام الكمان.

●

آية بنتى..
بتحببنى
وأنا كمان بأحبها
وبضمها لسدرى قوى
أرفعها لفوق
عصفور يزقزق فى الهوا
ونغنى سوا
أنا وماميتها
لما تبتسم ابتسامة

●

آية بنتى..
فرحة الكون الحقيقى
وطلة الأزهار
فى بستانى

ونور منور في الضلام
هي غنوة
للزمان
وأحلى كلمة فوق لسانى
آية بنتى..

• ماكنش مجرد طفل •

• إلى روح الطفل الشهيد : محمد الدرة •

كان ويا أبوه
وعيونہ النونو بتبوس الشمس
وتصبّج ع الأغصان الخضرة
كان وشه بيضحك
وصوابعه فى صوابع أبوه
ودراعه الثانى بيتطوّح
يحضن ببراءة الأحلام
ويقوله أبوه:
يا «محمد» أنا عايز أجيبلك أحلى هدية
أتمنى عليه..
يضحك ببراءة وسخرية

ويقول: يابه..

أنا عايز شىء أكبر منى

أكبر منك .. أكبر م الأيام

أنا بحلم بيه

من أول ما حبيت على أرض فلسطين

وترابها عفر على وشى

ولس جسمى

من أول ما بدأت

أشم نسيم الصبح الطازة

وتخش فى نخاشيشى روايحه

وأصافح بعيونى الأقصى

كل صباح

من أول ما بدأت أرسم

بالطباشير

وع الكراريس

النجمة إياها اللى أنا بأكرهها

أم ست سنان

بأحلم بالقدس عربية
ما تعرف جنس يهودى جبان
ويطول العمر..
وأكون ظابط وأحرر بايديا
بلادى
وأحقق ليها الحرية المسلوبة
من عمر الشعب المظلوم

●

وف لحظة..
«والدرة» عمّال يحلم
وأبوه ويّاه بيشاركه الحلم
انفتحت نار الغدر عليهم
واترصدهم صهيونى عنيد
منزوع من قلبه الرحمة
ماهزه صراخ الطفل
ولا صوت الأب وهو بيترجاه
أمطرهم برصاصه الحى

كان عايز دم الطفل يسيل
رغم إنه فى حضن أبوه
ضربوه برصاصه
دخلت قلبه النونو.. وسكنت فيه
كان قلبه ساعتها بينبض بفلسطين
واتبعتر دمه الطاهر
ع الأسفلت
رسم النجمة اياها
وأبوه اتكوم جنب الحيط
اتخطفت روحه
وقلبه م النبض وقف
وجسمه اتفربل..
من رصاصات الغدر الصهيونى
وكأن الجندى كان حاسس
إن «الدُرّة» بطل وشجاع
مش بس مجرد طفل بيحلم
لكن كان عارف

إن «الدرة» شاييل وطنه
جوه فى قلبه الأخضر
ومخبيه برموشه من الأعداء



• حُبُّكَ مَجْنُونِي •

ما تبعديش..
عن ضى عيني «يا منى»
قلبي انتشى منى
وطار عصفور طليق
ف الهوا
عشق الغنا والزقزقة
فبلاش بقى
تُقَلُّ البنات
حبك مجننى
وانتى ما بين الرمش والننى
وهدوئك الشريات

فی منامی بیزورنی
أصحی علی سکر نبات
وأبات..
والقلب بیغنی

• مين يقدر •

الولد الوردة -

الموت بيشف..
وبيخطف من نن عينا النور
فتضيع فى الضلمة حزاني
والكلمة المكسورة على طرف
لسان الشاعر
بتضيع فى المعنى
إيه معنى..
إنك بتضيع زيها
مش لاقى ملامح نفسك
صوتك / همسك
هريانة قصيدتك زى خيول مطلوقة

وسيباك..
مطحون في ملامح بكره الجاي
إزاي هاتكون
يا صحابي الواقفين
على ناصية روحى
بتصحوا جروحي
فأموت في اليوم الواحد
ميت مرة
على فين هانروح
والكلمة الحرة
كرباج على ظهر الواحد فينا
ملدوعة عقارب روحك
مقتولة
مقتولة أيامك / وسنينك
وضميرك بيفزك
زى الإبرة في كم قميصك
فتقوم مفزوع

يا صحابى دلونى
أنا عارف لونكم من لونى
إيه معنى الكلمة
إن كات خوافة وجبانة
إن كات مكسوفة من عرى صاحبها
وخجلانة
تصبح دبلانة على عودها
مين يقدر يوعدھا
ترجع بسمتها الفرحانة
فتعود روحها المنتشية
جريئة وحرّة زى ما كات
بتصحّى الناس من عز النوم.

●

• على فين يا هشام •

• إلى روح الصديق، هشام فاروق عبد الجواد •

بتغيّم شمسك..
رغم الضى النابع من وشك
كان يبهل..
لما تطلّ عنيك
بتشّر كل همومك
ع الأصحاب
وتفرّق بختك..
والحبل بيرقص فى البلكونة
سكوت
الضحك مخاصم فيك شفاتيك
وبتكتم غيظك

فى الأوقات الصعبة

بارود

على فىن يا هشام..١٩٠

خطاوىك يتحازى رمل السكة

والأسفلت

مكشوفة لكل الناس

لكن مدارية عليك

وعنيك بتبص على الأفراح

بالشوق

تتمنى تنقرش يوم كفيك

بالحنة

وتخشى الجنة مع الداخلين

على فىن يا هشام..١٩٠

أنا سامعك لسه يا دويك

بتنادى «حُسام»

ويتخذه من ايده ع الأسفلت

للسكة الطارحة حواديت

وحكاوى جديدة

تحكى له عن سر البنت

اللى اديتلك دبله

وجواب مكتوب بالأخضر

وبينضح قبله..



على فين يا هشام..!

دحبيبك يومها كات على موعد

لابسه الفستان الكرانيش

وبتحلم بالكورنيش

وايديك الدافيه

بتنادى على العصافير يا هشام

وبتسقى الطاير والمجروح

من بين كفينها المرمز



- إيه سر غيابك قوللى

دانا لابسہ التولى

وباستناك
هاتجيني هناك
على أول ناصية فرجى
والطرحة يا دويك بأغزلها
من خيط الحب الواصل بينا
غيبت على ليه يا هشام.. ١٩٠٠
الحنة نشفت من كفينى
وأنا قلبى حمام
طاير لبلدكم
وبيسأل كل ولادك يا «برنبال»
عن شاب وسيم
تايه في دروبك وشوارحك
بيحب الجميزة والساقية..
والشجر الطارح والصفصاف
والسكة الممدودة
م البيت «للعالى»
فى القمرة الزاهية ولابسة

نهار
والضحك مع الأصحاب بيصهلل
والنكتة هزار

●
وتعبت من المشاوير يا هشام
(كيلوباترا)^(١) ما عادت بتشم
روايحك
(وميدان الرمل)^(٢) بيسأل
عن خطاويك
يا تخدني معاك.. يأتجيني
أنا هاستاك على أول ناصية
فرحى
والطرحة يادوبك باغزلها
من خيط الحب الواصل بينا

(١) حى بالإسكندرية.
(٢) ميدان شهير بالإسكندرية.

وقفلت بیبان قلبی

علیک

ماعدتش تساع غیر ضی

عنیک

أنا هاستاک.. یا هشام

ولآخر عمری ما تمس ایذا

غیر نبض ایذیک.

• قصايد حزينة •

• (١)

بتطير عصافيرى تزقزق
يمّة أفراحي المنسية
ويخاف الليل لو طل
لا الشمس تكون مستتياه
فتتور وشه الكالح
ويضيع فى اليم

•

• (٢)

إمبارح..
طار الفرع الساكت
من عمر قديم
فابتهجت روى
بحب جديد.

• (٣)

مش قبل ماكنت أسافر
كنت أطوى الأيام فى ايدى
وأفردها شعاع
من ضى الروح
يا وجع مجروح..
ليه طعم الأحزان
بيمرر ويزيد
والأيام بتتن
مش يمكن جن

بيحاول يلفى فى ملامحنا
ويشتت أحلامنا
على كل الطرقات
فتموت فى الزحمة
ويموت الحرف الحر
على سن القلم المسنون.

● (٤)

مش لازم أبداً
من ضى عيونك
ولا من طعم شفايفك
أنا هابداً من ذاتى
لما الذات بتخف
من تقل الحمل
على كتافى.

●

● (٥)

هايعدى اليوم؟

- معقولة ..

ونعدى وراه

- إيه يعنى

شايلىن العلم المحنى

بينز نزيڤ الروح

المخزى.

• آيات العشق •

دغدغنى شوقك ع المدى
تراتيل آيات العشق
ما تشق سدر الكون
وأخرج بحظ الشيطان
أبعثنى للريح المهاجر..
أستجير بوجع
وأصب خوفي من رقيق الأمنيات
تطرح آهات
مفزولة من جفن السكات
تسبح فى دمي
أغنيات النار..

والذكرىات هى ارتباط

وتر القلوب

مغلوب على أمرى

وبيتكسر فى الأنين

•

يا عاشقين..

كل الصبايا اتبعتروا

ولا عاد حنين

مكسوف يا قرص الشمس

من بجة عنيك الديبلانين

وحريق سواقى الوجد فى ضلوعى

لهب حيران

وأنا يوم طلوعى

كان أخضر

وكان راكب حصان رهوان

يا بلبل الأوطان

أنا ولى... ويل

والليل رفيق نهنيات قلبى
ولمن يميل غصن الزيتون؟
ولمن يكون حد السكون؟
مفطوم بطعم السلسيل..
فى النيل..
قناديل حروفك مَدَح ف عيون
القمر
ونسيم ربيع بيبوس حدود
تفاح
ارتاح يا قلبى م التعب
وافرد بساطك ع العتب
تقراك حبيبتك..تنقشك
جوه الكتب.

●

• اللصوص ييطفوا لمبات النيون •

Handwritten text, possibly a signature or name, written in cursive script.

الصور متعتمة
والقلب مكسور وشاتت
يا مين يلمنى من بين
ضلوعى المهروسين
أطلع حزين ممصوص
أصل اللصوص بيعدوا
من جوا الفرخ
ويطفوا لمبات النيون
زى العيون لما تغيّم
ويضيع بصيص الضى
أنا حى ميت حى

يا منتهى أملى الضعيف

ليه الخريف فارد شراعه

ع المدى

ومنشف الأغصان

ليه الهوى هريان

بنسمته الصافية

ولا السنين جافية

والروح خلاص بتروح

يمّة رماد الطيارات

والزعبيات ف أمشير

صواريخ بتطلع فى الفراغ

وتطيش

ترجع مافيش

لكن دانات الفقرا والمحرومين

متكومين فى الخيش

مستنظرين تَكَّة زناد

مايطيش

والتمثلية الغبية محبوكة ع الآخر
واحنا بندقع من رغبف القوت
ولاد بتموت.



أغنية للبساطة

قراءة في ديوان «الولد الوردة» لعبده الزراع

أمجدريان

الكتابة الشعرية بالعامية المصرية اليوم أصبحت ذات
تراث كبير، ومرت بتاريخ طويل من الزجل، ومروراً بتجارب
حداد وجاهين فشعراء الستينيات، فالسبعينيات حتى
وصلت اليوم إلى ما يسمى بقصيدة النثر العامية، ودخلت
في المفهوم الجديد للكتابة الذي تتدمج فيه الحياة بالفن،
والذي يساهم في التغيير الثقافي على كافة المستويات،
باعتبار أن الثقافة ليست مجرد أداة للمعرفة، بل هي فضاء
للتفاعل بين البشر وبين بعضهم بعضاً من ناحية، وبين

البشر وكافة الظواهر والأشياء المحيطة بهم من ناحية ثانية، وفضاء تتطور فى داخله المراحل المتوالية للمسيرة التاريخية، وتتغير تغيراً مطّرداً بما يتناسب ونمو الحياة الأدمية من ناحية ثالثة.

تحمل قصائد هذا الديوان فى طياتها رسالة اجتماعية، مضمونها الانحياز للإنسان البسيط فى أزماته الطاحنة التى يعيشها فى كل يوم، فى قرى صغيرة محاصرة بالأزمة الاقتصادية، وقرى صغيرة أخرى محاصرة بالقوات العسكرية الباطشة.

الكتابة الشعرية اليوم تتميز بملامح جديدة ذات طابع يختلف عما عرفناه فى السابق، ومن أهم هذه الملامح: التعدد، بمعنى أن الشعر اليوم يشهد تعدداً من حيث التيارات الشعرية والتوجهات المختلفة، وأنه لم يعد هناك مكان لتيار واحد أو مدرسة واحدة لكى تتسيد المشهد الشعرى، لكل مدرسة اليوم مكان مهم، وكل شاعر عليه أن يتعلم كيف يقيم علاقة يشوبها الاحترام المتبادل بين أسلوبه فى الكتابة وأسلوب الآخرين.

أما شاعرنا عبده الزرّاع فهو يعتمد أن يعود للتبسيط الشديد، والغنائية الرقيقة، ونحن بالفعل نعيش في زمن مدهش سيفاجئنا كل يوم بانتقالات فنية واندفاعات تعبيرية شديدة التنوع، تعتمد على كافة الاتجاهات والمدارس والرؤى من ناحية وكافة الأساليب التقنية من ناحية أخرى.

يعبّر الشاعر عن التفاؤل والحلم بالمستقبل رغم الصعوبات والمعوقات التي تحيط به وبنا في كل لحظة مورثة كل هذا الحجم من الإحباطات، ولكن الشاعر لا زال قادرًا على العطاء والحلم بالمستقبل: (يمكن أقدر أرسمك أحلى طريق).

لقد جسد الشاعر المعاناة: معاناته ومعاناة الناس من حوله، فصورّ البشر من حوله تائهين على شاطئ النيل (قصيدة: أغنية نار)، ولسانه يضيع في المعنى (قصيدة: مين يقدر)، ويقول أيضاً في القصيدة ذاتها: (مقتولة أيامك، وسنينك)، وفي قصيدة أخرى: (ويموت الحرف على سن القلم المسنون) وتتعدد الأبيات التي نستشعر فيها

معاناة الشاعر بسبب إحساسه بالقهر: (مغلوب على أمرى/
وبيتكسر فى الأنين)، ويعبرُ الشاعر فى المقطع التالى عن
إحباطاته بشكل رمزى:

مغنواتى أنا

أرغولى انتنى - قصيدة مغنواتى

وفى مقطع آخر من القصيدة نفسها

مغنواتى أنا

ضهرى انحنى

وقصيدة (مغنواتى) كلها، وهى ترمز للشاعر ذاته ورحلته
الفنائية تنتهى بالحزن الشديد الذى يقارب اليأس حيث
لون السواد (فارد ضلوعه) و (الأمل مكسور جناحه) والليل
أخطبوط يتمدد ليغطى كل شىء، على الرغم من نهاية
القصيدة التى تحاول جاهدة أن تعود لمعنى الأمل من
جديد، وأن تعود للتراث المصرى القديم ولكن المسألة تظل
رهينة المحاولة، والمحاولة تكون دائماً محاطة بكافة
الاحتمالات، حيث يكون الفشل هو أحدها بلا شك.

ولعل أحد أسباب الإحباط الشعور بعدم القدرة على
التحقق الإنسانى، وعدم القدرة على امتلاك الأشياء
والاستمتاع بالحياة، وعدم القدرة على اصطحاب الفتاة
الجميلة فالعمر (مخطوف)، والأمل ضائع، والتعطل يصيب
الحياة التى يشبهها بالقطار:

وصفير القطر المتعطل

فى محطات الروح

وهناك بشكل عام معنى الانتماء الذى يشكل قيمة
أساسية لدى الشاعر فهو يبحث دائماً عن قيم يؤمن بها
وينتمى لها، فهناك أبيات يطرح فيها كيف ينتمى إلى
أسرته، وأبيات يطرح فيها كيف تنتمى إليه ابنته، وكيف
ينتمى هو إليها فيهدى لها قصيدة (زى أنغام الكمان - إلى
آية بنتى.. وردة الروح) وبالإضافة إلى التعبير عن الفرح
بابنته، فهو يشرك أمها هذا الفرح ويقاسمها فيه ليصبح
للكيان الأسرى مكان مهم فى هذه القصيدة.

وكذلك هناك معنى الانتماء للبسطاء من هذا الوطن،
مما يشكل ملمحاً واضحاً فى هذا الديوان بداية من

الصفحة الأولى فيه، صفحة الإهداء: (إلى عمى عبده
الزراع عرفاناً.. ومحبة، إلى أبناء قريتى البسطاء برنبال)،
وتتكرر فى داخل الديوان المواضع التى يذكر فيها قريته
برنبال محباً مخلصاً، ومتفانياً فى حبه، يؤيد الشاعر أن
ينتمى إلى قريته، إلى المكان الذى نشأ فيه، والمكانية فى
الأدب هى التى تثير خيال الطفولة وتذكرنا المواضع التى
نشأنا فيها وكانت بداية تعرفنا على الوجود من خلالها،
وهذه المواضع هى الرحم الأول الذى لا يفارقنا أبداً. أو
هى الأماكن التى تعطينا الشعور بالألفة فى العلم، أو
الوجود فى العالم على نحو أليف being at home in the world
فيما يرى «جادامر».

وفى الوقت نفسه يعبر الشاعر عن الانتماء لنماذج
إنسانية أصبحت أقرب للرموز الإنسانية والفنية بسبب
وفاة أصحابها مثل القصيدة التى رثى فيها الشاعر
(إبراهيم غراب)، والقصيدة التى رثى فيها صديقه (هشام
فاروق عبد الجواد) وكأن معنى الرثاء سوف يسعفه فى
التعبير عن هذا الحس بالانتماء، ويمكننا أن نعمم المسألة

فنقول أنه يبحث عن طعم الحياة ونكهتها من خلال ثنائية الولادة والموت: ولادة كل المعانى الإيجابية فى حياتنا من ناحية، والموت المتمثل فى الموت الحقيقى الفيزيقي والموت الرمزي، والحروب التى صورها وصور معطياتها: الفارات والديناميت والبارود والخنادق وضرب النار.

يبحث الشاعر عن البدايات الأولى، البدايات الطازجة، والولد فى القصيدة الأولى يتهجى الحروف، ويتهجى الملامح، وهناك معنى الطفولة يستشرى فى الديوان كله، وفى القصيدة الأولى سنتعرف على جو المدرسة ومفرداتها: الطباشير والسبورة والشنطة المدرسية... إلخ.

كما يمكننا أن نتابع لدى الشاعر هذا الحس الأيديولوجى الذى يكمن خلف كل هذه البراءة والانتماء والبراءة، والقيم دائماً يدفعها موقف فكرى وفلسفى قوى، أو قل موقف أيديولوجى عميق يتجسد فى بعض القصائد فى صورة بيان سياسى أحياناً، مثل القصيدة الأولى التى سمى الديوان باسمها (الولد الورد) والتى يهديها إلى

أطفال الانتفاضة الفلسطينية، وعلى رأسهم محمد الدرة، ويهاجم فيها العنت الإسرائيلي ووحشيته فى ظل الأحداث الأخيرة فى فلسطين. وكذلك هناك قصيدة (ما كنش مجرد طفل) التى يهديها إلى روح الطفل الشهيد: محمد الدرة، والقصيدة مهمة وبالغة الدلالة لأنها تشير إلى فضح معنى شديد الإيلام هو تعمد العدو الصهيونى قتل الأطفال المغار الذين شكلوا نسبة كبيرة ومخيفة فى أعداد القتلى الفلسطينيين، كما يمكننا أن نتتبع بعض المعانى ذات البعد الأيديولوجى التى تتضمنها بعض الأبيات بشكل مباشر أو غير مباشر أيضاً:

ويموت الحرف الحر

على سن القلم المسنون

يتعمد الشاعر أن يستخدم الجو الشعبى المصرى الحميم، وأن يطرح المواقف والسلوكيات المصرية، ولا يمكن لدارس هذا الديوان أن ينسى الروح الشعبية البسيطة التى تفيض فى النصوص سواء من خلال التأثر بالحكمة

الشعبية أو المنطوق الشعبى أو الحدوتة أو الرؤية الشعبية
بشكل عام.

ونستمع فى القصائد إلى اللهجة الشعبية البسيطة
المحبة إلى نفوسنا جميعاً والكلمات التى لا يقولها سوى
المصريين بكل ما فيها من رقة وخفة ظل: (السكة الطارحة
حواديت - إدينى أمارة - مين يقدر - بيشعوط - شيطان من
يومه، وقرد بيتنطط تنطيط - على مرمى الشوف - وفتحت
الباب على وسعه - طراطيف - اتفرط الرمان - أبويا كان
فارس وبأسه شديد - منديل المحبة - نسيم الصبح الطازه -
ضى عينى - وغير هذا الكثير، مما نجده فى كل صفحة
من صفحات هذا الديوان).

والرموز والمعانى الشعبية لديه متعددة متداخلة مع
نصوصه بشكل تفاعلى حميم، وسوف نجد لديه: «ياسين
وبهية» و «أدهم» و«سيف عنتر مرسوماً على الزند»
و«الدروب» و«الجميزة» و«الساقية» و«القمر الزاهية»
وكذلك: «الحضرة» و«ال دراويش» و«الأوراد» والكلمات
الثلاثة الأخيرة تذكرنا بالتصوف بالمعنى الشعبى، وشاعرنا

يكثر منه، للدرجة التي يمكن فيها أن نقرأ عبارة موهلة في صوفيته من مثل: (الموت ييشف)، ويمكن أيضاً أن نقرأ مثل هذا المقطع:

عاكف في محراب السنين

بتدندن اللحظات

من وحى بوحك

وتسود الصفحات

من أمهات القول

قناديل بتجرى في الضلام

الحالك

كفك مش بيتهجى الطلوع

ولا كانش نجمك مختفى

ويمكننا أيضاً من داخل الجو الشعبي أن نتابع بعض العبارات من مثل:

(ما تصرنيش.. في منديل المحبة) أو هذا المقطع الذي يضمه الشاعر بعض معاني الفولكلور الفنائى المصرى:

صوتى القديم مبجوح

وامى وراه بتنوح

وتقول يا ولدى

يا طالع العلوة

هاتلى معاك غنوه

تشفى تداوى الجروح - قصيدة مغنواتى

أما الجو الرومانسى الرقيق فيشيع فى الديوان كله، من خلال هذا الحس الفرح، أو الباحث عن الفرح فى بعض الأحيان: (وعنيك بتبص على الأفراح - قصيدة على فين يا هشام)، ولنطالع هذا المقطع الذى يبحث فيه الشاعر عن المستحيل الجمالى الرومانتيكى، ويبحث عن حالة تبادل المشاعر الحميمة بين المحبين:

وأنا أفرد جناحاتى ع الكون

وأجيبك من ريش الطواويس

ومن النعام

وأجيبك أبريق

ورخام وأجيبك من عين السما

نجماية

إدبنى أمارة..

وأنا أدبك قلبى

هدية - من قصيدة (ادبنى أمارة)

ولدى الشاعر قصائد عاطفية رومانسية فى الحب
والغزل، مثل قصيدة (حبك مجننى)، وكذلك صور شعرية
كثيرة متفجرة بالروح الرومانسية الجميلة (متحزمة نجوم
السما بالورد - قصيدة مغنواتى)، ولديه معان كثيرة عن
الطفولة فى مرة، والحب والعشق فى مرة أخرى:

يا كعبك الداير

وجسمك الرجراج

ونهدك الفاير

والشاعر محب للحياة، ويلتقط هذا الحب فى سلوكيات
الآخرين، وذلك لأنه هو نفسه ممتلئ به، وفى قصيدته

للشاعر إبراهيم غراب يتذكر كيف كان الأخير يفتح الباب (على وسعه)، (ولا يوم رديته فى وش قصيدة) إنه يعانق الحياة والفن، ويفيض قلبه بالطيبة والعطاء وحب البشر.

وعلى المستوى الفنى يمكننا أن نرصد كيف تعتمد الشاعر أن يكون غنائياً وبسيطاً غاية البساطة، للدرجة التى قد يقف فيها عند بعض المواضع القليلة على الحدود بين الفن وغير الفن، بخاصة أن أعماله السابقة، ودواوينه السابقة، كانت تميل إلى التكتيف الفنى واللغوى والإكثار من المجازات بأنواعها، البساطة هنا نلاحظها فى اللغة الحديثة الواضحة والمعانى شديدة السهولة، والتى نعرفها ونكررها فى حياتنا اليومية، بل وهناك معان أخرى نرددها فى الأغاني الإذاعية المعروفة مثل عنوان قصيدته (حبك مجننى)، وكذلك (إيه سر غيابك قوللى)، (باستاك) - من قصيدة (على فىن يا هشام)، و (ابتدا المشوار) إلخ..

وهناك خاصية يستطيع القارئ أن يطالعها وهى استخدام «الفاء الاستتاجية» التى تعطى إحساساً بالوصول إلى نتيجة تختلف عن المقدمة، اكتشفها الشاعر

فأعجبتة فأكثر منها، ونحن لا نعلم هل هى لهجة محلية
تخص قريته أم أنها اكتشاف للعبة شعرية خاصة، تخلق
نوعاً من المتعة اللغوية؟ وإن كان تكرارها يقلل من قيمة
اللعبة بشكل عام (فتعمى عنية/ فيموت م الضحك) (قصيدة
الولد الوردة) - بتخش الفرحة فى قلبى/ فتبوح الأحلام
بالسر (قصيدة: إدينى أمارة) - مشوارى لسه مابتدأش/
فبلاش تخوضى التجربة (قصيدة فارس الأحلام) -
فاستخبى بالورق منه، فبيت رسم برواز (قصيدة: وردك
عتيق) - وطار عصفور طليق/ فبلاش بقى تَقُل البنات
(قصيدة حبك مجننى) - بتصحوا جروحي/ فأموت فى اليوم
الواحد ميت مرة (قصيدة: مين يقدر) - وغيرها الكثير).

ولكن هناك مشكلة فى استخدام (كل)، فهى تعرقل
الاستخدام اللغوى فى كثير من الأحيان، وتبدو كما لو كانت
حشواً زائداً: (مجاديف الطيف الهائم ليل/ همومك ع
الأصحاب - (قصيدة: على فين يا هشام)

وهناك سلبية أخرى نحب أن نناقش فيها الشاعر لما
فبها من أهمية فى عملية التلقى، وهى أن التقفية فى

بعض المواضع كانت ذات طابع توليدي بالدرجة الأولى،
ويحسن للشاعر أن يلاحظ هذه القضية ويعمل على
تلافيها في أعماله القادمة: (لابسه الفستان الكرنيش/
وبتعلم بالكورنيش)، (إيه سر غيابك قوللي/ دانا لابس
التوب التوللي) - من قصيدة (على فين يا هشام) وذلك لأن
الشاعر يعرف جيداً معنى وقيمة القافية التي تأتي بشكل
عفوى صادق وديوانه ملء بها، وتجربته تمكنت من أن
تطرح نماذج عالية من الجودة الفنية.

يكتب الشاعر القصيدة متوسطة الطول وهو الشكل
الفناني التقليدي، ولكنه أيضاً قدم لنا القصيدة القصيرة
المكثفة وهي قصيدة أكثر احتشاداً إذا بحثنا عن الجانب
الفني، وهناك قسم في الديوان أسماه: (قصائد قصيرة)
خصصه لهذا النوع، وكذلك قسم آخر أسماه: (قصائد
حزينة) وهو مكون من مجموعة من القصائد القصيرة التي
يشيع فيها حزن عميق، له طابع خاص يدل على الافتقاد
وعدم التحقق الإنساني، ويعبر عن شجن وجداني يندرج
داخل إطار اجتماعي يختلف عن الحزن الوجودي الذي
طرحه من قبل شاعر مثل صلاح عبد الصبور.

والصورة الفنية الجيدة هي أحد مساعى هذا الديوان،
وقد تحققت بالفعل فى الديوان من خلال الصورة البلاغية
الجزئية فى مرة، والصورة الكلية التى تتحقق فى مشهد
كامل مرة أخرى، ولنتابع هذه الصورة الجميلة المتوزعة على
مشهد شعرى كامل يوضح لنا كل هذا الابتهاج بابتته وهو
ابتهاج سنعيش معه فى القصيدة بكاملها، إلا أن هذا
المقطع يكفيننا الآن لتبيان كل هذه البراءة وخاصة عندما
جاء التعبير العفوى الذى يصفها فيه بأنها (من غير سنان)
ليؤكد معنى البراءة بأسلوب طريف وبخاصة أن معنى
الأسنان ينطوى فى أعماقه على معنى الشر منذ المراحل
البدائية الأولى، حسب (ليفى شتراوس):

ترفع إيديها للسماء

وتقول: يا اا با

أضحك قوى

من جوه قلبى

وهى تضحك من غير سنان

زى أنغام الكمان

لقد سعى الشاعر فى هذا الديوان فى طريق العمل
الشعرى الذى يؤسس للبساطة والدخول المباشر إلى ضمير
متلقيه، وحاول فى الوقت نفسه أن يعبر عن مجموعة من
المعانى التى تعبر عن انتمائه للبسطاء من هذا الشعب،
فكان هذا الجو الشعبى الحبيب إلى النفس، والذى يفيض
بالرقة والرومانسية، ويمتلئ فنيًا باللغة البريئة، والصور
الجميلة، ومن أجمل المعانى التى تعبر عن رؤية الشاعر
مجملة:

هربانه قصيدتك زى خيول مطلوقة

وسيباك..

مطحون فى ملامح بكره الجاى

إزاي هاتكون؟

● **الشاعر في سطور:**

- عبده الزرّاع.
- شاعر وكاتب أطفال.
- عضو اتحاد كتاب مصر.
- مدير تحرير مجلة قطر الندى.

● **صدر له للكتاب:**

- ١ - البندق طاش رشاش على شعري - ابداعات - ١٩٩٦.
- ٢ - آخر حكايات سهرانة - الجوائز - ١٩٩٩.
- ٣ - الراجل اللي بيهذي - كتابات جديدة - ٢٠٠٣.

• صدر للأطفال :

- ١ - رسمنا وردة - قصائد - كتاب قطر الندى - ١٩٩٦ .
- ٢ - أوبريت: أحمد عرابي - مجلة أفاق المسرح - ٢٠٠٠ .
- ٣ - ليلة مولد النبي - مشترك - كتاب الهلال للأولاد والبنات - ٢٠٠١ .
- ٤ - أراجوز فنان - قصائد - كتاب قطر الندى - ٢٠٠٢ .
- ٥ - العصافير بتحب النور - قصائد - المركز القومي لثقافة الطفل - ٢٠٠٣ .

• قيد النشر :

- ١ - ديك الدويكة - قصائد للأطفال - هيئة الكتاب .

• له تحت الطبع :

- ١ - مسرحية : البحث عن أرنوب - للأطفال .
- ٢ - مسرحية : القلم المغرور - للأطفال .
- ٣ - أوبريت : عيد ميلاد جزيرة - للأطفال .

الفهرس

الإهداء	٣
الولد الورد	٥
اديني أمار	١١
موسيقى العمر المخطوف	١٧
كلنا أحبابك	٢٥
أغنية نار	٣١
مغنواتي	٣٩
قصايد قصيرة	٤٥
وردك عتيق	٥٧
زى أنغام الكمان	٦٣
ماكنش مجرد طفل	٦٩
حبك مجننى	٧٧

٨١ مين يقدر
٨٧ على فين يا هشام
٩٥ قصايد حزينه
١٠٣ آيات العشق
١٠٩ اللصوص يطفوا لمبات النيون
١١٥ اغنية للبساطه .. قراءة فى الديون . أمجد ريان

مطابع الهيئة المصرية العامة للكتاب

رقم الايداع بدار الكتب ٥٨٧٨ / ٢٠٠٤

I.S.B.N. 977 - 01 - 9056 - X